

Monumento di Piscadonan Perdi Riba Lama

Piscadonan perdi riba lama ta haya un monumento solem na un luga special den comunidad di Aruba



ORANJESTAD -- Den cuadro di e desvela di e Monumento di Piscadonan Perdi riba Lama, cu lo tuma luga diamars 27 di augustus na Governors Bay, a combersa cu e artistanan encarga pa traha e bunita obra aki.

Na momento cu Aruba a haya confronta cu e calamidad, unda cu dos piscado a ser perdi riba lama casi 2 aña pasa, Minister Otmar Oduber a bin cu e iniciativa pa conmemora e piscadonan cu no a regresa cas bek, como tambe brinda e familiaman un poco consuelo pa nan perdida.

Durante e seleccion pa e obra monumental aki, e comision encarga cu esaki a haya presentacion di diferente artista local, unda cu e obra di Sr. Gilbert Senchi y Fernando Vermeer a represalia.

Ambos artista ta indica di tabata inspira pa motibo cu e obra aki tabata uno sumamente bunita y nacional cu a sigur lo yuda na nan creacion artistico.

Manera cu Sr. Senchi ta indica, a opta pa un obra solem cu ta honra e piscadonan cu no a yega cas bek, brindando e respet necesario na e famianan. Pa por a logra e diseño di e obra aki, ambos artista a indica di a haci e estudionan necesario pa crea un pieza

digno pa e piscadonan.

Un parti di e obra aki a wordo traha na Aruba mes y otro parti den exterior. Sr. Senchi a splica cu mirando e importancia di e monumento aki a opta pa a haci tur e trabou di marmier y smelt e copro y e trahamento di e glas di e strea pafo di Aruba, teniendo na cuenta cu esaki ta un monumento publico.

E artistanan kier a entrega e famianan un monumento sostenibel y duradero. Sr. Vermeer tabata encarga pa ehecuta e piezanan cu tabata falta aki riba nos isla mes.

E artistanan a tuma bon nota pa incorpora e parti ecologico tambe den e obra, unda cu a importa e marmier aki di Amazona, Brazil pa contribui un tiki na nos medio ambiente tambe.

Ta un gesto hopi noble di e Minister di Turismo, Transporte y Labor, Otmar Oduber pa honra nos piscadonan y duna e famianan di cada un di nan un poco consuelo. Minister Oduber ta spera cu e monumento aki trece mas conscientisacion pa loke ta trata e aspecto di seguridad pa e comunidad di piscado, mirando cu no por premira naturaleza pues ora di subi lama mester ta bon prepara y Minister no kier pa mas piscado perde riba lama. □

